

HSET TIT

Phaulô achìh ka Tit

Bàu bòch hmàih

¹ Au kô Phaulô, hapǒng da Boc Plình, broq mangai Tiaq cla da Chuaq Jesus Christ, hu qnùng bài mangai Boc Plình ma khoe ràih, òeq wì haq i manoh lùì rai loq bàu joq qnàng, aih trong ajèn wì trùh ta kan loq iu yùq,

² hu tangèh gòm kan rìh halình, aih kan rìh da Boc Plình Mangai ma ùh jò leq capoch qnùt, khoe tèu am enh qnhòng calah baxèm.

³ Trùh jò ma khoe pajaq, Boc Plình qnoh dèh bàu loh ta qngah ajang bàu hnài aih la bìac ma khoe jao am ka au tiaq bàu thê da Boc Plình aih Chuaq dèch bèn.

⁴ Au achìh jàiq kô ka Tit, aih joq kon da au oe ta manoh lùì pajùm: waiq kan tabàih xam kan catèm trùh enh Boc Plình, aih Baq, xam enh Jesus Christ, aih Chuaq dèch bèn.

Bài gucraq tanòe Tagop Hadròeh

⁵ Au òeq kon oe ta Coret, òeq hu palauq hlài bài yiniq ma qnhòq jah taqmroq, tiaq bài bàu au khoe hnài kon òeq dèch paqnàng bài gucraq ta rìm phòq.

⁶ Rìm ngai gucraq ep geo ùh i qmòe ajang leq hu cwò, aih óng da mòeq ngai mai raq, wì kon haq ep lùì Chuaq, ùh i cabô trùh doe wì haq rìh ùh lem, ùh iu.

⁷ Majah qmang aih, mangai wèq oh daq aih mangai wèq ta hnìim Boc Plình haq ep ùh i qmòe ajang leq hu cwò. Ùh khòh catèh, nòeh, bù bia, ngang dù, ònh ka bac jènh,

⁸ mahaq ep panim ka ðìh tamoe, broq bua ti mangai khun khuq, rabiaq, taq atoq, hadròeh, i kan amàn,

⁹ Haq wèq cajap yôt trong joq qnàng qmang ka haq khoe jah tamàng, ðòeq haq jah ðoe tiaq trong lem ðòeq hu pariaq alòng mangai qnoeq rai loq hatèu hlài bài mangai ma enh tablêq.

Kan ùh wìa da mangai Coret

¹⁰ Majah qmang aih i bàc ngai, ta aih ma yi hlòm aih bài mangai ma tiaq ranenh kat akia, wì haq ùh waq iu, ja capoch lîq làn rai toq ti padô qnùt, troq ka ep bàng ðac hacùng wì haq aih.

¹¹ Pàng wì haq daiq toq ka trong bac jènh dài majah hnài trong ùh khòh hnài, ti raliang ðac hnìim mangai qnoeq.

¹² Taqne wì aih i mòeq ngai, haq aih mangai pajàu da wì aih, doe rameh: Mangai Coret loq amòng, aih bài tiah ka ngè plai toq ka acaq mahaq aroh.

¹³ Bàu anoe aih troq. Qmang aih ep lech ka wì haq ja cajoq, dôq wì haq jah i manoh lùì ma joq qnàng,

¹⁴ apaq tamàng dèh bàu ùh i xèm goe da mangai Judà, xam ranenh da bài mangai ma ùh waq tiaq bàu joq qnàng.

¹⁵ Rìm yiniq ðìq lem hreo ka mangai lem hreo, mahaq ka bài mangai ma amùà ma ùh lùì, aih ùh i

cleq ma hadròeh, majah qmang aih gàu ngoc xam manoh cliac wì haq khoe amùà.

¹⁶ Wì doe ðeh loq ka Boc Plình, mahaq tiaq bìac broq aih ðìq chàih cađac haq, joq jàng toq ka git, ùh qnì iu, pi jah broq qmòe yiniq cleq ma lem.

2

Rìh ti mangai craq, ti guqyoh xam mangai broq hapõng

¹ Mahaq kon ep hnài trong ma hatroq tiaq trong lem.

² Pariaq mangai craq loq amàn, rìh laq alàng, rabiaq, i manoh lùì, i manoh loq waq, loq kềm rìm trong.

³ Bài craq cadrì hanoh qmang aih, ep rìh ma hatroq tiaq kan hadròeh, apaq capoch qmèq, apaq ôq hrìn alac, ep yõc kan rabiaq ðòeq hu ti hnài trong leq ma lem,

⁴ aih èh wì haq jah pariaq bài gucadrì oe raq qyoh hanam loq waq dèh ka õng ka kon,

⁵ loq wèq rađeh, i manoh hliang lem, loq wèq ngan bài yiniq ta hnim, acaq oe khun khuq, loq iu dèh õng, ðòeq trong da Boc Plình ùh hìaq i mòeq nà bàu capoch qmèq.

⁶ Hadai ep pariaq hnài mangai radam acaq oe i kan amàn.

⁷ Yõc qmòe cla kon xam manoh hnhoh jang, laq alàng ðòeq broq dua lem ka wì,

⁸ capoch bàu loq hèm, ðôq ùh hìaq i ajang leq hu cwò, ðòeq mangai ma tagit ka bèn loh ka xep, ðôq wì ùh jah capoch qmèq qmòe ka bèn yac ka trong leq.

⁹ Hnài bài mangai broq hapõng ep iu dèh cla craq, rìm yiniq ep broq lem manoh wì craq, apaq rahen,

¹⁰ apaq atùng da wì cleq, mahaq ep paqnoh yôt ðeh kô ðiq ka manoh jang lem, ðòeq broq ka qngah trong da Boc Plình, aih dèch Chuaq da bèn, oe ta rìm trong.

¹¹ Majah qmang aih, kan tabàih da Boc Plình ðòeq dèch rìm ngai khoe jah trùh.

¹² Kan tabàih aih hnài bèn ep loq cađac trong ùh iu yùq ka Boc Plình xam trong crõng taneh kô ma ònh, rìh taqnhòng kô ep loq wèq rađeh, taq atoq, loq hanò,

¹³ jò qnang tangèh gòm xôq ramot da bèn xam kan ranhòm da Boc Plình haqhèq xam Dèch Chuaq da bèn aih Chuaq Jesus Chirst trùh.

¹⁴ Haq aih Mangai khoe cađac rađeh ðòeq baxon ahlài bèn claih enh yiniq lui rai broq ka bèn jah hreo, yõc bèn hu broq moeq nang noe crài da haq, aih nang noe i manoh nhet ka broq trong lem.

¹⁵ Drah hnài bài yiniq aih, yõc ðiq dèh ka cwàng ðòeq pariaq, tagàih. Apaq cađac cabô jù halê kon.

3

Ep rìh qmang leq

¹ Ep bahnàng ka bài oh daq ep iu bài mangai i cwàng, mangai broq gàu, ep tamàng bàu wì aih, yac ka jò leq dua padon rađeh ðòeq hu broq trong lem,

² apaq capoch qmèq ka cabô, apaq tajênh, ùh taqmrua, ep i manoh laq alàng ka rìm ngai,

³ Majah qmang aih, enh nèh bèn hadai blùng, ùh qnì iu, cađac wì qnùt đac rađeh, broq đic ka bàc trong đeh ma enh, rìh tiaq kan dù, tajì ka wì ma git, yac ka cla bèn hanoh tagit ka dabau.

⁴ Mahaq pang jò kan laq alàng da Boc Plình, aih dèch Chuaq bèn xam kan loq ha-och da haq, khoe jah paqnoh am ka bèn, aih haq hi dèch bèn,

⁵ ùh xài tiaq kan taq ataq cla bèn khoe broq, mahaq tiaq deh kan loq waq da haq. Haq dèch bèn ajang kan qnheo hreo rai ha-uang hlài bèn, paneo hlài bèn xi Yiang Hadròeh

⁶ Haq ma khoe ùc qnoh ka bèn ùh dìq ùh dài, xam Jesus Christ, aih Dèch Chuaq da bèn;

⁷ đòeq bèn canòm kan tabàih haq đòeq hujah broq mangai taq ataq, wìa kon hatia hu wiang jah tangèh kan rìh halinh mòeq đòe.

⁸ Bàu kô joq qnàng, au enh kon anoe parìt yiniq kô, đòeq bài mangai ma khoe lùì Boc Plình panim ka broq lem. Bài yiniq kô dìq lem rai jah lòeq ka rìm ngai.

⁹ Mahaq ep wia ka hangai kan tarahen blùng ratùt, kan taboe nang noe, tarahen trong ranenh, majah qmang aih bài yiniq aih dìq lùch lùa ùh i jah cleq.

¹⁰ Jò bèn khoe cwò ka mangai ma broq kan talah jah mòeq yàng baiq yàng, khoe ka aih chaq wia ka hangai,

¹¹ bèn loq bài mangai qmang aih khoe pi hnhoh jang, broq toq yiniq lui, cla taqmòq ka rađeh kan hadrah.

Bàu tanap ma qnoeq

¹² Trùh jò au thê Atêma tàng ùh meh Tichicô lam ta kon, kon haqnàn ka tồc tagùng Nicôbôli ti au, majah qmang aih au khoe ùac ka oe ta aih clech ka ralim.

¹³ Drah ti àu padon palauq ka Xêma aih mangai hnài ranenh xam Abôlô, apaq ðòeq wa aih nan ka dahwèq cleq jò wa aih loh lam.

¹⁴ Mangai tiaq trong da bèn ep ðìq ka manoh hỏc broq trong lem, ðòeq wiang tabàih am ka mangai qnoeq jò wì nan ðeh, ðòeq wì ùh hìaq rìh mahaq ùh loh plì.

¹⁵ ðìq ðỏng wì ma oe ti au tanap bàu hmàih trùh kon. Bỏch hmàih bài mangai ma loq waq ka bèn ta manoh lùì.
Waiq kan tabàih oe ti oh daq!

Hset Hadròeh
The New Testament in the Hre language of Vietnam,
translated by Baq Thi

Copyright © 2024 Baq Thi

Language: (Hre)

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-07-23

PDF generated using Haiola and XeLaTeX on 26 Jul 2025 from source files dated 23 Jul 2025

03fbbc53-13cb-5444-945a-741163b0252d